

Liebei Jungendfest Gäst, liebi LehrerInne und vorallem liebi Schüeler und Schüelerinne vo de Abschlussklasse, denn hüt gohts um euch.

Wenn ich Lüt verzälle das ich Bobfahrer bin, isch die hüfigsti Reaktion: 'Ah wie die vo Jamaika, Cool runnings!'

Abgseh devo, dass ich tatsächlich so us gseh als chönt ich für die Jamaikanisch Bobmanschaft starte, isch de Film "Cool runnings" natürlich unglaublich bekannt und beliebt und wird warschinlich deswege vo allne erwähnt.

Ich bin mer aber garned so sicher, ob euchi Generation de Film no kennt. 8 Johr bin ich nämlich älter als ihr. Und wenn er s'Gfühl hend, ich be en Unc, de Film isch nomol 9 Johr fröhner use cho als ich.

33 johr isch das also her, und trotzdem kennt und luegt mer de Film hüt no. Wieso? han ich mer denkt, als ich de Afang vo dere Red gschriebe ha.

D Antwort lieht glaub ich, imene chline Reihm wo im Film vor chunt: 'Das geht über eure Vorstellungskraft, Jamaika hat ne Bobmanschaft.'

"Über euchi Vorstelligschraft" würd ich behaupte, isch de Hauptgrund wieso die wohri Gschicht so villi berührt und begeistert het. Will es eifach unfassbar isch, das en chlini Insle, wo kein Tag vom Johr en Schneeflocke gseht und fern ab vo jedere Bobbahn lieht, a de Olypische Winterspiel teil nimmt. Die Unwahrscheinlichkeit, ah sones schwiriges Ziel z'cho, isches was d Masse fasziniert. Au ich hätti glacht, wenn mer öper gseit hätti, du wirsch mol Bobfahrer, als ich do wie ihr jetzt ah mim letschte Jugendfest ide Oberstufe, no liecht wasted, ide Stadt chille ghocket ha.

Wemmers aber vo Weg hend, wo über d Vorstelligschraft gönd. Müemer garned so wiit go sueche. De Grossteil vo euchne Eltere hätti sich i euchem Alter au ned chöne vorstelle, dass es sie mol det herezieht, wo sie jetzt sind. Au euch ziehts nachem Summer alli in en neuu Richtig, es neus Kapitel fangt ah und au wenn er scho wüssed i welli Richtig es goh sött, bliebed warschinlich die wenigste uf dem Pfad, denn euch stönd immerno unzähligi Chance offe. Und Ich hoffe die werded er gseh und nutze.

Ich stoh hüt vor euch um Lebenswiisheite z'verzelle, aber wenn ich ehrlich bin, hani mis Lebe selber noni so im Griff, wie ich das gern hätti und ich glaub das goht villne i mim Alter eso, ob wohl mer mit sechzeni villicht en anderi Vorstellig devo gha het wie's nach zwenzgi usgseht. Darum gsehn ich mech ned ide Position euch Wiisheite fürs ganze lebe zgä, sonder vorallem Ratschläg für die paar Johre wo ich euch vorus bin.

Chance ergriefe isch ned immer so eifach wie es tönt. Mer seit zwar immer alli Töre stönd der offe aber die wenigste säged der, dass ned alli Töre für dech gmacht sind, das isch härt, aber das han ich au scho müese lehre. Demit mein ich; en Sach wo wie en Chance erschieht, öpis Grosses z'erreiche, cha sich als öpis usestelle, wo euch nume abezieht.

Teilwiis mues mer chli sueche bis mer das gfunde het wo eine wiiter bringt und erfüllt. Für das roht ich euch: Bliebed offe für Neus so lang er no d'Möglichkeiten dezue hend und säged au eifach mol "jo", selbst wenn er's nacher villicht bereued. Öppe so wie ich, als ich zuegseit ha, die Red z'halte. Das bedütet ned Angst z'ha, mol en Schritt zugg z'mache und öpis anders z'probiere. Hend au kei Angst devo uf d Schnörre z'gheie oder doppelt doppelt so lang z'ha wie die andere. Tönt zwar chli lame aber glaubed mer, es isch am Schluss halb so wild. Uf social media hani scho viel bull shit vo irgendwelchene Influencer ghört und er sicher au, aber öpis womit die meiste recht hend isch, das mer ide "Comfort-zone" weder öpis verändertet, no öpis Grossartigs erreicht. Ich glaub de Arda Saatçi zum Beispiel, isch au ned I sinere komfortable Zone blibe. Also hend de Muet z'verlüre. Getraued euch öppis neus z'probiere woner ned die beste drin si werded, wie de Jamaikaner Derice Bannock mit sim Bobteam. Und wenns euch mit über 130 km/h im Iskanal uf de ranze haut sinder entweder gschid, lerned us euchne Fehlentscheidige und höred uf oder ihr sind so dumm wie ich und mached wiiter.

Als Sportler gseh ich s'Lebe echli wie es Rönne. Jede stellt sis eigene Rönne uf d bei. Sprich er wähled euchi eigeni Distanzkategorie, und er secklet mit euchere eigene Pace. Während em Rönne werdet er anderi überhole, er werdet vo anderne überholt oder secklet en Teil zemme zum sich gegesitig pushe. Aber er kenned weder Ihri Kategorie no wie wiit sie scho i ihrem Rönne sind. Darum löhnd euch ned z'fest devo beihdrucke was die andere Läufer mached. Will mitem Resultat müend am Schluss nur er z'friede si und zwar nur ihr! "Danke" seit euch im Ziel keine. Die nägste paar Johr werded en Ziit si I dere ihr usefindet wie ihr das Rönne gställte wönd und was für en Art vo Läufer er sind. Aber gell damit er mech ned Falsch verstönd es isch und bleibt es Rönne also hustled für euchi Ziel und versuched z'gwünne.

Vor 8 Johr ha ich do ghocket wo er jetzt sind und ich mues ehrlich si ich mag mech nüm a villes vo eusere Red erinnere. Und nei, das lieht ned ade Spassgetränk wo möglicherwiis am tag vorher konsumiert wurde sind. Es lieht glaubs au ned ade Schläg, wo ich whäred em Bobfahre ufe chopf becho ha, will mine ehemalige Mitschüeler got es zimli glich.

Nei simmer ehrlich, die Meiste do dinne denket entweder grad no dra, wie sie sich gester obe ned getraut hend ihre Crush azpspreche oder sind im Chopf scho bim Manöver und de Bahne vo hüt Nomitag. Und da isch au ok so, es isch schliesslich

Jugendfest , aber wenn ihr nume scho öpis, was ich euch as Herz gleit han, mitnehmed und im Hinterchof bhaltet, gsehn ich das scho als en absolute Win!

Ich hoffe ich ha gnueg Jugendwörter und Anglezisme verwendet, damit er mech au verstande hend. Übertreffed d Vorstelligschraft um grossen z'erreiche, sueched euchi Chance und bliebet ehrgizig!

Damit wünsch ich euch no es unvergesslichs Jugendfest.

Danke Mitenand!